

Es Wossa (Bad Khan)

Des Wossa rinnt unta de Schottn / des Wossa rinnt unta de Baam
Im Schottn is a ned bessa / vo da Hitz samma scho gaunz waach
Es riacht so siaß vom todn Hoiz / owa mia san do ned allaa
Und ees Wossa is des anzige / wos uns jetz no höfn kau

Des Wossa kitzlt deine Finga / des Wossa streichlt deine Zeechn
Deine Finga kaun i nimma dawischn / Es hod mi scho daune trie'm
Blitzblaue Liböön schwimman durch d'Luft / wia waun olles aus Wochs gmocht wa'
Oba es Wossa is des anzige / wos mi vo dia wegtreim kau

Des Wossa bringt uns Staana / des Wossa bringt uns Zeit
Unta de Staana: a rostiga Löff'e / und a Föödfloschn aus Emaille
De Weidn san schene oide Frau'n / mit launge grüne Hoa
Und es Wossa is des anzige / wos ma ned aufhoidn kau

Des Wossa glitzert jetz scho rot / des Wossa wird boid schwoaz
De Gössn haum an Hunga griagt / owa dia is des egal
Des rode Liacht, des mocht mi schwoch / mei Heaz wird schwora und schwa
Und es Wossa is des anzige / in dem o'tauchn kau.

Glizzah (in de Hoa Blues)

Do is ana aufgewochd, in da Fruah,
Mid an murdsdrumm Kraumpf in sein rechtn Fuaß.
Do is ana aufgewochd, in da Fruah,
Hois und Hian nu ziemlich zua.
Do is ana aufgewochd in da Fruah,
Glizzah foid aus seine Hoa.

Zwa au'gsoffane Typm, aun ana Bar.
Ana scho a bissl ööda, da Aundre ned gaunz allaa...
Zwa au'gsoffane Typm, aun ana Bar.
Fünf Bia haums scho, in etwa.
Und se hümmen ständig iagndwos, oda iagndwen au.

Und si redn vo dera Stimm, de s' nimma ausm Kopf ausse griagn.
De si au'gschlichn hod, wia ra finstane Kods.
De ihrn Plotz ei'nimmt, ihre Kreula ausfoad.
Und wia s' Heazn brichd, wia waun s' nix aundas kunnt.

Ma siachd de zwa daun rodlos vorm Kaffeehaus steh,
Späda daun aum Proda vorbei geh...
Da Spass hod scho zua, owa da Mittwoch wiad woch.
Ma siachd ei'steign de zwa, Messe U2...

lagndwo genngan s' fiaranaund,
iagndwie lossd des Fiawa laungsaum noch.

Jo, wia gsogd, do is ana aufgwochd, in da Fruah
Allaa in seim Bett und de Stimm woa auf amoi weg.
Do is ana aufgwochd, allaa, in da Fruah.
Vo de zwa Typm, der ane, und ned da Oide, des worst *du!*
Jo *du* bisd aufgwochd in da Fruah, mid Glizzah in de Hoa...
owa dea Glizzah woa nur der vom vorign Joa...

Wia 's liachd wiad (Schlaflied)

Und waun du spüüsd,
daun kau i schlofm,
so wia ra Kods auf
deim Klavia.

Und waun du wüüsd,
daun kau i woatn,
bis dass da Wea-woif
wieda a Schoof wiad.

Und wauns d' mi füümsd,
daun schau i schmäh-staad,
so wia ra Kods ins
Oofm-tial.

Und wauns d' mi oo'füüsd,
daun kau i schlofm,
bis dass da Nochdbus
wieda a Bim wiad.

Und waun du kochsd,
daun kochsd mid Glizzah,
so wia da Zimtstaub
vo am Komet.

Und waun du lochsd,
daun hea i 's knistern,
wia de roochn Nuu'In
vo am Instantsuppm-packet.

Und wauns d' ma a Gschenk mochs,
daun is des gschmeidig,
wia de Saunt-haut vo
mein Jackett.

Und waun i aufwoch,
hosd mi augmoid,
mim Heiligschein vo
am Prophet.

VON MARIO SCHLAGER (am Kontrabass: Adele Knall)